

Uunga siunnersuut: Siusinaartumik pensionisiat pillugit Inatsisartut inatsisaat nr. xx, xx 2014-imeersoq (Ilaqtariinnermut Inatsisinillu Atuutsitsinnermut Naalakkersuisoq)**Saqqummiussissut**

(Ilaqtariinnermut Inatsisinillu Atuutsitsinnermut Naalakkersuisoq)

Siullermeerneqarnera

Naalakkersuisut matumuuna siusinaartumik pensionisiat pillugit inatsisartut inatsisissaattut siunnersuut saqqummiuppaat.

Siunnersuutip tunuliaqutaa tassaavoq siusinaartumik pensionisiallit ilatsiinnarluni pilersugaa-nermit sallinngortillugu sulisinnaassutsiminnik atorluaasinnaanissaat namminneerlutillu iserti-taqarnissamut periarfissat kajumissuseqarnerullu nukittorsarnissaat pillugit kissaateqarnek. In-nuttaasut nukissaminnik pitsaanerpaamik atuinissamut periarfissinneqarnissaat taamatullu imminnut pilersorlutik atugaqarnissamut periarfissaqalernissaat Naalakkersuisut siunnersuu-tikkut kissaatigaat. Innuttaasup nalinginnaasumik suliffeqarnissamut periarfissatigut killeqar-nerat sammiinnarnagu siunissami innuttaasut nukissaat sammineqarnerulissapput.

Naalakkersuisut isumaqarput innuttaasup pineqartup angerlarsimaannarluni ilatsiinnarnermin-ngaanniit inuiaqatigiinnut tapersiinissaa pitsaanerusoq. Tapersiinerit suulluunniit siusinaar-tumik pensionisiallimmut namminermut, qanigisaasunut inuiaqatigiillu aningaasaqarnerannut pitsaasumik sunniuteqassapput.

Tamanna siusinaartumik pensionisiallip tiimini qanoq amerlatigisuni sulisinnaanera apeq-qutaatinnagu atuuppoq.

Siusinaartumik pensionisiallit amerlanerusut suli sulisinnaassuserisartik atorluarsinnaassavaat, taavalu aaqqissuusseqqinnermi nalinginnaasumik suliffissaasut ullup affaanut suliffissanik ne-qerooruteqarsinnaanginnerini pisortani piffissap ilaannaani suliffiit amerlanerusut pilersin-neqassallutik.

Aaqqissuusseqqinnikkut sulisinnaassuseq pinngitsoorani naliliiffigeqqinneqartalissaaq kingu-sinnerpaamik ukiut tallimakkuutaarlugit. Sulisinnaassusermik nalilersueqqittarnerup malitsi-gissavaa inuttaasup taassumalu ineriartornerata annerusumik qitiutinneri. Taama iliornikkut siusinaartumik pensionisiallit suliffeqaratik ilatsiinnalernissaat pinngitsoortinneqassaaq.

Kommune najugaqarfigisaq innuttaasunik ingerlaavartumik samminnittarnissamut pisussaaf-feqarpoq. Tamatuma saniatigut kommunip najugaqarfigisap aamma suliffeqarfinnik pilersitsi-nissaaq taamalu iliornikkut siusinaartumik pensionisiallit ikiornissaat sammissavaa.

Siusinaartumik pensionisiallit sulinissamut aningaasanik kajumissaarutissaqassapput taavalu pensionisiat aningaasartaasa saniatigut isertitaqassallutik.

Siusinaartumik pensionisiallip isertitaasa annikilliertortinnerini aningaasartai allanngortinneqarput, sulinissaq sulisinnaassutsillu atorluarnissaa kajuminnarnerulersillugu.

Naalackersuisut isumaqarput inuit imminnut pilersorsinnaasut pisortanit pilersorneqassanngitsut. Taamaattumik siusinaartumik pensionisialik taassumaluunniit inooqataa siusinaartumik pensionisiat saniatigut tamakkiisumik akissarsiaqaraluarpalluuniit pensionisiallit siusinaartumik pensionisiassat 20 pct-iinik pisaannarnissaa isumannaarneqarsimavoq.

Naggasiullugu inatsisikkut erseqqissarneqarpoq innuttaasut sulisinnaassuseerussimasut piginnaanngorsaqqinnikkullu sulisinnaassuseqalernaviannnginnerat nalunangilluinnarpat piginnaanngorsarneqartariaqanngitsut sulisinnaassutsimillu naliliiffigeqqinneqartariaqaratik. Innuttaasut sulisinnaassuseqanngitsut pinngitsaalillugit sulilersinneqanngippata taakku pitsaanerusumik periarfissaqarnissaat inatsisissatut siunnersuutikkut isumagineqarpoq.

Inuiaqatigiinni sanngiinnerpaanut pitsaanerusumik periarfissaqartitsinissaq innuttaasullu suliffeqalissutigisinnaasaanik innuttaasunut immikkut, aaqqissuussaasumik ataqatigiissaakkamillu aaqqissuussinermik salliutitsinissaq Naalackersuisut kissaatigaat.

Taamatut oqaaseqarlunga saqqummiussissut Inatsisartunut oqaluuserisassanngortippara.